

MIFAMOTOANA AMIN'I JESOA KRISTY

Isan'andro mandritra ny taona

 **BOOKELIS**

TENY FANOLORANA

Ahoana no fomba amantarana ny sitrapon'Andriamanitra? Raha efa nandalo tao an-tsainao izany fanontaniana izany, dia natao ho anao ity boky ity. Ta hanovo hery sy handray fahazavan-tsaina hoenti-miatrika ireo sedra - fizahan-toetra - fakam-panahy - sakana – na olana va isika? Manan-kambara momba izany izao asasoratra izao.

Ity boky nosoratan'i Sarah Young ity dia manome taridalana mazava ny amin'ny maha zava-dehibe ny fotoana iarahan'ny olona iray amin'i Jesoa Kristy. Andaniny, dia vehivavy manam-pahaizana sady lalin-tsaina i Sarah Young vokatry ny fianarana izay norantoviny ; tsapany anefa fa misy fahabangana ny fiainany. Ankilany, amin'ny maha vadina misionera mpitory filazantsara azy sy ny fianarana ara-teolojia nataony dia nanana ny toerany teo amin'ny tontolo arapivavahana ihany koa izy, saingy mbola tsapany hatrany ilay fahabangana teo amin'ny fiainany. Tamin'ny alalan'ireo trangam-piainana izay nolalovany no nitaoman'Andriamanitra azy hahatakatra fa «*sarobidy ny fananana fifandraisana velona sy manokana amin'ny Tompo Andriamanitra, Ilay nahary izao rehetra izao*».

Miara-mandeha amin'Andriamanitra ! Izany andianteny izany ihany koa no azo amehazana ny votoatin'ny boky izay anasana antsika ho amin'ny famakiana mitohy ombam-pahalianana.

Mpanompon'Andriamanitra vitsivitsy no ambaran'ny Soratra Masina fa niara-mandeha tamin'Andriamanitra, ary anisan'ireny i Enoka (Gen 5. 22, 24). Misy fiantraikany miavaka eo amin'ny fiainan'ny olona iray ny fiaraha-mandeha amin'Andriamanitra, ary niaina mivantana izany ihany koa ny mpanoratra. Hay ve azo atao tsara ny mandre an'Andriamanitra miresaka sy mampahafantatra ny sitrapony isan'andro ! Ankoatra ny fanokanantsika fotoana ivavahana na iresahana amin'Andriamanitra, dia mila mianatra ihany koa isika ny manokana toerana sy fotoana anginana ka amelana ny Tompo hiteny ary hampahafantatra amintsika ny sitrapony.

Miavaka amin'ny samy asasoratra ny fomba nandrafetana ny boky satria ilay resaka manokana nataon'Andriamanitra tamin'ny mpanoratra no zaraina amintsika. Isan'andro ary mandritra ny 365 andro dia miteny ary mampahafantatra ny sitrapony Andriamanitra. Ankoatra izay anefa dia misy ihany koa ireo Soratra Masina isan'andro izay mifanindran-dalana amin'ilay hafatr'i Kristy. Anisan'ny voarakitra ato amin'ny boky ary mampitao ho amin'ny fananana toe-tsaina miabo sy tia mioitra ohatra ny nambaran'i Kristy tamin'i Sarah Young manao hoe: *«aza toherina na andosirana ny olana miseho*

eo amin'ny fiainanao. Tsy fifandrifian-javatra akory ny fisian'ireny. Natao indrindra ho fitahiana voarafitra sy sahaza avy amin'Andriamanitra ireny mba hahasoa anao ... mba hianteheranao bebe kokoa amin'Andriamanitra».

Manampy antsika hiaina ny fahamarinan'ny Soratra Masina izao asasoratra izao araka ny voalaza manao hoe «*Misaora an'Andriamanitra amin'ny zavatra rehetra, fa izany no sitrak'Andriamanitra hataonareo tafaray amin'i Kristy Jesoa » 1Tes 5.18 (DIEM).*

RABENJARISOLO Olivetino Fabrice, Mpitandrina
Tale Nasionaly Fikambanana Mampielany Baiboly Malagasy

08/05/2024

TENY FISAORANA

Isaorana an'Andriamanitra ny fivoahan'izao boky nosoratan'i Sarah YOUNG izao.

Mino izahay fa ny mpino kristianina na ireo mbola hotaomintsika sy hampirasihintsika

hanakaiky hatrany an'i Kristy dia hankafy izao boky nosoratan'i Sarah YOUNG tamin'ny teny amerikana izao, izay nadika tamin'ny teny frantsay ary atolotra ny mpamaky malagasy amin'ny tenim-pirenena malagasy ankehitriny. Zava-dehibe izao fifandraisantsika sy fifanentanantsika hiaina hatrany ao amin'i Jesoa Kristy izao.

Zava-dehibe sy sarobidy izao na eo amin'ny sehatry ny finoana kristianina, manamafy ny fiaraha-mino sy fiaraha-miaina amin'i Jesoa Kristy sy ny fiombonan'ny mpino eran'izao tontolo izao, na eo amin'ny sehatry ny asasoratra sy ny dikateny sahaninay eo amin'ny literatiora izay manjary tetezana mampiray firenena maro eo amin'ny fanatanterahana ny hetahetan'ny Tompo : «Mba ho iray ihany izy rehetra »

Isaoranay eto ireto namana, mpiara-miasa taminay nanatontosa izao asa fanolorana ny «MIFAMOTOANA AMIN'I JESOA KRISTY » **(Un moment avec Jésus)**, Sarah YOUNG amin'ny teny malagasy izao :

- Yvette RABEMILA, Secrétaire générale pour Madagascar au Conseil World Mission tao Londres (CWM) Mpitandrina misotro ronono.

- Oliva RAMAVONIRINA, Membre titulaire de l'Académie Malagasy, Directeur scientifique Foibe momba ny teny an'ny Akademia malagasy, (Centre des Langues de l'Académie Malagasy).
- Noroelisoa R. RALINJATOVO, Pasteure, Directeur du Séminaire de la Faculté de Théologie de l'Eglise de Jésus Christ à Madagascar (FJKM).
- Marie-Angèle RAHARIJAONA, Mpitandrina, Mpampianatra, Mpanoratra, Poety, Mpikabary.
- Liliane RABARIMANANA, Mpampianatra teny anglisy

Isaoranay indrindra koa Désiré ANDRIAMAMPIANINA Mpitandrina mivady nampita izao sosokevitra handikana ny « **Un moment avec Jésus** » izao amin'ny teny malagasy ary niezaka hahazo alalana tamin'ny **Société Biblique de Genève** (Maison de la Bible), izay tolirana fisaorana mitafotafo mba hahazoana manaparitaka izao boky izao aty amin'ny Nosy Madagasikara.

Esther R RANDRIAMAMONJY,

Membre Titulaire de l'Académie Malagasy ; Présidente de la Section des Sciences de l'Art et du Langage ; Ancienne Directeur du Centre des Langues de l'Académie Malagasy ; Présidente d'Honneur S.L. de l'Académie Malagasy.

30/06/2024

MIANTSO I JESOA

Tamin'ny toerana kanto dia kanto no nahatsapako voalohany ny fanatrehan'Andriamanitra, nianatra tao amin'ny firaisana kristianina iray tao amin'ny vohitra kely any amin'ny Alpes frantsay. Sampana iray amin'ny «Abri» io toerana io (minisitera iraisam-pirenena noforonin'i Francis sy Edith Schaeffer). Nandritra ny fotoana nipetrahako tao amin'ny «Abri» dia nandinika akaiky ny tontolo iainana nahavariana nanodidina ahy aho. Efa nadiva hifarana ny ririnina, ny hafanan'ny masoandro mitataovovonana dia ampy nipetrapetrahana tany ivelany saingy mbola tsy niempo ny oram-panala noho ny hateviny. Ny hazavan'ny masoandro mibaliaka eo amin'ny oram-panala fotsy mangatsaka kosa nanazava ny saiko avy amin'ny maizina nangeja azy nandritra ny taona maro.

Isan'andro dia miakatra havoana mideza iray aho ahafahako mahita ny hatsaran'ny manodidina. Tontolo meva, tsy misy pentina no nahalasa vinany ahy avy eny ambony eny. Tazako avy eny koa ilay tanàna misy tilikambo avo be nofinidiko honenana. Raha mihodina aho dia mahita ny farihiben'i Zenevy (Genève) avy lavitra miarahaba amin'ny feo avo ao anatin'ny tara-masoandro. Raha mitraka kosa dia mahita ny tendron'ny Alpes rakofan'ny oram-panala mampirifiry. Nihodina aho ka nihodina nandray izay azoko

noraisina rehetra miaraka amin'ny masoko roa sy ny saina manam-petra.

Zanaka vavina mpampianatra tany amin'ny sekoly aho, nampirasihina ho tia fatratra vaky boky ary hizatra hahaleo tena rehefa misaina. Nianatra filozofia tao amin'ny Wellesley College aho ary efa saika vitako tao amin'ny Oniversiten'i Tufts ny fanomanako ny masitera momba ny fanabeazana ny Ankizy. Volana vitsivitsy talohan'izay dia nasain'ny anadahiko novakiko ilay *«Fitsoahana ny fonjan'ny Fahendrena» («Escape from Reason»)* nosoratan'i Francis Schaeffer. Akory ny hagagako sy ny hafaliako fa io boky kely no namaly fanontaniana noheveriko hatry ny ela ho tsy mety hahitam-baliny. Nikaroka ny tsy azo ihodivirana, ny marina tsy manampiovana aho. Ny fitsipi-piainana tsy azo hodivirina raketin'ny bokin'i Shaeffer no antony nisintahako tamin'ny toerana tsy misy pentina toy ity. Nikaroka ny tsy azo ihodivirana sy ny marina tsy manampiovana aho : fototra tiako hanorenana ny fiainako.

Fotoana fohy tao aorian'ny nipetrahako tao amin'ilay trano nozaraiko tamin'ny mpianatra hafa dia nifankahita tamin'ny mpanolo-tsaina tena mahay tonga tao amin'ny Abri Suisse hiresaka tamin'ny sasantsasany taminay aho. Niditra tao amin'ny efitrano nisy azy aho ary nasainy nakatona ny varavarana. Mbola tsy tafapetraka akory aho dia nanontaniany hoe : *«kristianina ve ianao» ? «Tsy tena azoko antoka»*, hoy

aho ; faniriako ny ho kristianina saingy tsy hitako izay idiran'i Jesoa amin'izany. Nieritreritra aho hoe : «*mety ampy ny fahalalana an'Andriamanitra*». Ny fanontaniany faharoa dia hoe : «*nona no tsy voavelanao amin'ny tenanao*» ? Nitondra ahy teo anoloan'ny fahotako io fanontaniana io ary azoko avy hatrany ny ilako an'i Jesoa : mamonjy amin'ny fahotako. Avy eo, nony izaho irery no sisa dia nangataka taminy aho mba hamela ny heloko sy ho Mpamonjiko.

Indray alina, niala tao amin'ny trano mafana nonenanay aho ary nandeha samy irery tany amin'ny tendrombohitra feno oram-panala. Namakivaky toerana nisy ala matevina aho, nahatsiaro ho marefo ary talanjon'ny hatsiaka sy ny hakanton'ny manodidina tarafin'ny hazavan'ny volana. Maina sady nangatsiaka ny rivotra ary nanindrona nony fohina. Fotoana fohy avy eo dia tonga tamin'ny toerana mazava, tsy nisy hazo ny tenako ary nijanona tsy namindra intsony. Toa nihantona ny fotoana rehefa nibanjina am-pahagagana ny manodidina ahy aho, rendrika tanteraka tao anatin'ny hatsaran'ity toerana ity. Nijanona ny fotoana nandritra ny nandinihako am-pahagagana ny nanodidina ahy. Tampotampoka teo dia nahatsapa fanatrehana nahafinaritra teo anilako aho ary ny zavatra tonga ho azy tato am-bavako dia ny hoe : «*Jesoa tsara indrindra*». Ity fahatsapana ny fanatrahan'i Jesoa ho an'ny tena manokana ity dia tsy toy ny valiny aratsaina notadiaviko. Ity dia fifandraisana amin'Ilay nahary izao

tontolo izao, ny Lalana sy Fahamarinana ary Fiainana (Jaona 14. 6).

Ny taona taorian'izay, rehefa niverina tany Etazonia dia nahatsapa indray ny fanatrehan'i Jesoa. Vao avy namoy namana hatry ny ela aho ary nanontany tena hoe : *«misy fahasamihafana ve ny maha kristianina na tsia eo amin'ny lafiny kalitaon'ny fiainana»?*

Tamin'izany fotoana izany dia mpanoratra ara-teknika tany Virijinia (Virginie) no asako. Nalefan'ny lehibeko tany Atlanta aho hanatrika fivoriana, sarotra tamiko ny nanaiky nanantontosa io iraka io ary tsy tena tamin'ny hafanam-po no nakako hotely hipetrahana. Feno alahelo tanteraka aho nony irery tao amin'ilay efitrano koa lasa nirenireny eran'ny lalan'i Atlanta niezaka ny nanadino ny fahanginako. Nitopy tamin'ny boky vitsivitsy teo amina mpivaro-boky iray ny masoko. Boky nosoratan'i Catherine Marshall mitondra ny lohateny hoe : **«Beyond ourselves»** no nanintona ny masoko. Novakiko ilay boky tamin'iny alina iny ary tsy nahatsiaro ny tenako ho irery intsony aho. Nandohalika teo anilan'ny fandrianako tao anatin'ity efitrano manana aina ity aho ary nahatsapa ny fanetrehana mahery ny fiadanan'Andriamanitra sy fiadanana nanarona ahy. Fantatro fa niaraka tamiko i Jesoa ary nangoraka ny foko, naratra Izy. Ity Jesoa ity dia ilay Jesoa be fitiavana hitako tany amin'ny hakanton'ny Alpes Suisse rakotry ny oram-panala.

Nandritra ny enina ambin'ny folo taona taorian'izay dia nilaozako ny fiainana kristianina milamina. Niditra tao amin'ny **Covenant theological seminary** (toerana manomana ho mpitarika ao am-piangonana) tao Saint Louis ny tenako ary nahazo ny diplaoma masitera momba ny fanoroan-kevitra sy fianarana Soratra Masina. Nandritra io fianarana io no nifankahitako tamin'i Steve vadiko, zanaka sy zafina misionera tany Japana. Nanorina fiangonana kristianina tany Japana no minisitera niandraiketanay mivady nandritra ny efa-taona indroa. Tamin'ny efa-taona voalohany no niterahanay ny zanakay mianadahy rehefa niala sasatra tany Etazonia.

Vita ny valo taona dia niverina tany Etazonia izahay ary nipetraka tany Atlanta. Mpiasa sosialy tao amin'ny fiangonana japanizy i Steve, izaho kosa niverina nianatra tany amin'ny Oniversite. Sady nianatra aho no niofana tao amin'ny toerana fanoroana hevitra tao Atlanta. Tena nankafiziko ny traikefa azoko tamin'ny fanoroana hevitra ireo vehivavy naratra arapanahy ka nitady fanasitranana teo amin'i Kristy. Misaotra ny Tompo koa aho noho ny fananako vady feno fitiavana sy ny zanakay izay fifaliako indrindra eo amin'ny fiainana. Tsy nahatsapa ny fanatrehan'i Jesoa kosa anefa aho na indray mandeha aza nandritra izay enina ambin'ny folo taona izay.

Noho izany dia vonona ny hanao fikatsahana ara-panahy aho. Natomboko tamin'ny famakiana boky mampahery fanahy izany : «**The Secret of Abiding Presence**» nosoratan'i

Andrew Murray. Io boky io dia milaza fa ny fanatrehan'Andriamanitra dia tokony ho tsapan'ny kristianina mandrakariva. Manindry ny ilàn'ny tsirairay fotoana irery i Murray ifanatrehana amin'Andriamanitra ao amin'ny fahanginana ary tsy tapatapahina. Fotoana tsy dia nilamina tamin'ny fiainako no nanombohako namaky ity boky ity. Teo am-piandrasana ny vizà (fahazoan-dalana handeha, **visas**) mankany Aostralia izahay ahafana manangana fiangonana japanizy any. Niala tamin'ny asako aho mba ahafahanay mandeha miampita ranomasina ary tsy maintsy nanaiky izany. Tao anatin'izany fiovana nifamahofaho izany no nitadiavako ny fanatrehan'Andriamanitra. Nanomboka teo ny androko nitokana niaraka tamin'Andriamanitra, nampiasaiko tamin'izany koa ny Baiboly, boky fampaherezam-panahy, diarim-bavaka, penina ary kafe. Tahaka ny fohy loatra ny ora iray na roa niarahako taminy.

Ny tsy fahazoana antoka ny zava-nisy tamin'izany andro izany dia nampitombo ny fanakekezako an'Andriamanitra. Na izaho na ny vadiko tsy nisy nahalala ny fotoana hivalian'ireo vizà honenana any Aostralia koa toa ela dia ela ny fiandrasana. Nandritra io fotoana io dia nodidina inefatra aho (anisan'izany homamiadana tamin'ny hoditra indroa). Andininy iray ao amin'ny Baiboly izay nampahery ahy tamin'io fotoan-tsarotra niandrasana io sady nifikirako nandritra ny dia ana habakabaka toy ny tsy hifarana nankany Aostralia : « *Fa amin'ny fifaliana*

no hivoahanareo, ary amin'ny fiadanana no hitondrana anareo» (Isaia 55. 12).

Tonga tany Aostralia izahay ka nonina tao ary nanomboka ny minisiteranay. Nanampy an'i Steve aho nanorina ny fiangonana japanizy voalohany indrindra tany Aostralia, fa ny minisitera tena nifantohako dia ny fanoroana hevitra ny vehivavy, ny sasany tamin'ireny tafavoaka tamin'ny fanararaotana mahatsiravina sy fangejana ara-panahy.

Ny minisiteranay mivady dia nametraka ny fianakavianay tao anatin'ny ady ara-panahy goavana, ary nivavaka isamaraina aho mba hoarovan'Andriamanitra. Indray maraina teo am-pivavahana aho dia nahita an'Andriamanitra niaro ny tsirairay taminay. Ny zanako vavy voalohay, avy eo ny zanako lahy ary farany i Steve no hitako nohodidin'ny fiarovan'ny fanatrehan'Andriamanitra. Rehefa nivavaka ho ahy aho dia voahodidina tampoka fahazavana manjelatra sy fiadanana lalim-paka. Tsy nitady ity fanatrehan'Andriamanitra mahery be ity aho saingy noraisiko am-pisaorana ary nanatanjaka ahy izany. Roa na telo andro avy eo fotsiny, nisy olona mpaka torohevitra tamiko izay afaka tamin'ny sedra no nanomboka nahatadidy ny fomba satanika nampiharina taminy. Ity fomba fanao satanika ity dia manery ny olona (mazàna zaza) hatrika fangejana mahatsiravina, fampijaliana manetry. Niaraka nizotra tamin'ny lalana maizin'ny fahatsiarovana izahay sy ilay olona be herim-po notoroako hevitra. Fa izaho kosa efa

nomanin'Andriamanitra tamin'ny fandrakofany ahy tamin'ny fahazavany be voninahitra alohan'ny handehanako any amin'ny haizina lalina. Azoko fa ny fahatsapana ny fanatrehan'Andriamanitra dia tsy natao ho ahy irery fa hanampiana ny hafa koa.

Ny taona manaraka dia nanontany tena aho hoe «*azoko soloina tsy ho izaho irery ve ny miteny mandritra ny fotoambavako fa ifampizarana*» ? Efa nanoratra tao anaty diary aho taona maro saingy teniko izaho samy irery. Izaho nefa nila an'Andriamanitra hiteny tamiko, *inona no tiany hambara amin'ny andro voatondro* ? Tapa-kevitra ny «hihaino» aho miaraka amin'ny penina etý an-tanana, vonona ny hanoratra izay «bitsika» tonga ato an-tsaiko. Araka ny voasoratr'i J.I Packer hoe «*mitantana ny sainao Andriamanitra rehefa avelatrao eo anatrehany ny olana*» (notsongaina tamin'ny boky mitondra ny lohateny hoe : «**Your Father loves you**»). Ny fibanjinana an'i Jesoa sy ny Teniny eo am-pangatahana Azy hitarika ny saiko no fomba nihainoako Azy. Tsy niandry handre feo aho fa niezaka kosa nitady ny Tavany (Salamo 27. 8).

Dia niova ny vavaka nosoratako : tsy izay tao anatin'ny saiko samy irery intsony fa lasa ny fifanankalozako tamin'Andriamanitra. Ity fifandraisana vaovao amin'Andriamanitra ity no lasa zavatra nisongadina tamin'ny androko. Fantatro tsara fa tsy tsindrimandry ny asasoratro

(satria ny Soratra Masina ihany no avy amin'ny tsindrimandrin'Andriamanitra) fa nanampy ahy nanatona bebe kokoa an'Andriamanitra izany. Lalana tena mahafinaritra nampahery ahy tamin'ny Tompo (1Samuela 30. 6).

Teo ampianarako nitady ny Tavan'Andriamanitra dia ity andininy ao amin'ny Baiboly ity no nanova ny fiainako : *«mitsahara , ka aoka ho fantatrareo fa Izaho no Andriamanitra» (Salamo 46. 10)*. Ny teny hafa azo andikana ny hoe «mitsahara» dia «atsaharo ny adinao» na «mitonia» na koa «avelao». Antson'Andriamanitra hametraka ny ahiahintsika eo Aminy ary mitady ny fanatrehany. Anisan'ny boky nanampy ahy koa dia ny an'i J.I Packer sy Carolyn Nystrom mitondra ny lohateny hoe : **«Praying : Finding our way Thgrough Duty to Delight»** (Ny vavaka : fahitana ny lalana avy amin'ny adidy mankany amin'ny fahafinaretana). Ao anatin'io boky io dia misy teny nindramina avy amin'i Martin Luther King manao hoe : *«Raha tonga ny Fanahy Masina ka manomboka mitory ao am-po (nao, manoro anao hevitra feno fahazavana sy harena... aza miloa-bava fa henoy Izy izay mahay miteny tsara noho ianao, mariho izay voalazany ka soraty ; noho izany dia hiaina fahagagana ianao araka ny tenin'i David mpanjaka hoe : «ampahirato ny masoko mba hahitako Zava-mahagaga ao amin'ny lalànao» (Salamo 119. 18)*.

Nandritra ny fotoana niandrasako ny fanatrehan'Andriamanitra sy fihainoana Azy miaraka amin'ny penina eny an-tanana dia hitako fa lohahevitra momba ny fiadanana no miha mibahana ao amin'ny diariko. Mino aho fa nampiseho izay ilaiko ity fironana ity. Toraka izany ireo olona mila torohevitra rehefa tonga miresaka amiko dia hitako fa ny ankamaroan'izy ireo koa dia mila ny balisaman'ny fiadanana ao amin'i Jesoa.

Ity fitsaharana eo anoloan'ny fanatrehan'Andriamanitra ity dia nampitombo ny fifandraisako akaiky taminy. Noho izany dia tiako ny mizara santionany aminareo asasoratra notsongaiko nandritra ireny fotoana tao anatin'ny fahanginana ireny. Any amin'ny toerana maro manerana izao tontolo izao dia maro ireo kristianina mitady hiaina ny fanatrehan'Andriamanitra sy ny fiadanany. Ny Baiboly ihany no tenin'Andriamanitra sady tsy misy fahadisoana ary mba niezaka koa ny tenako hanoratra ny marina, tsy misy fiovaovana. I Jesoa no ampitenenina ato amin'ny asasoratra koa rehefa mampiasa ny hoe «Izaho», «Ahy», «ny ahy», «ny Tenako» dia i Jesosy izay fa rehefa mampiasa ny «ianao», «anao» kosa dia ianareo mpamaky izay.

Nampiako fanondroana avy amin'ny Baiboliko ny vavaka isan'andro. Teo am-piandrasana ny fanatrehan'Andriamanitra dia ny andininy na ampahan'andininy avy ao anaty Baiboly ary nampifamatorako amin'ny vavaka ireo. Ny teny nosintonina

avy amin'ny Baiboly dia natao sora-mandry. Misy lavalava izy ireny indraindray ao anatin'ny asakorako satria nampiasain'Andriamanitra ireny fehezanteny ireny hanamafisana sy hampirisihana ahy hitraka avy amin'ny “fahoriana maivana mandalo”mba hibanjina ny fomba fijery mandrakizay (2Korintiana 4.17).

Ny lohahevitry ny fisaorana sy fahatoniana koa dia miverina matetika nandritra ny fotoana fihainoako an'Andriamanitra. Lohahevitra hita matetika ao amin'ny Baiboly koa ireo ary tena ilaina amin'ny fifandraisana akaiky amin'ny Tompo.

Ny vavaka ato anatin'ity boky ity dia natao hovakina miadana, raha azo atao dia ao amina toerana mangina miaraka amin'ny Baiboly. Tadidio fa i Jesoa dia Emanoela, amintsika Andriamanitra.

Enga anie ka hitombo ao aminao mandrakariva ny fahatsapana ny fanatrehany sy ny fiadanany.

Sarah YOUNG

Janoary

*Fa Izaho mahalala ny hevitra iheverako anareo, hoy ny Tompo, dia
hevitra hahatonga fiadanana, fa tsy loza, mba hanome anareo
fanantenana ny amin'ny farany.*

Jeremia 29. 11.

1 janoary

Avia manatona Ahy amin'ny saina vonona handray fampianarana sy fanavaozana. Ny fiombonana aina Amiko dia tsy hafa fa fiainam-pihavaozana mitohy sy maharitra. Aza miverina amin'ny fomba fanao taloha intsony amin'ny fiandohan'ity taona vaovao ity. Katsaho amin'ny fahalalahan-tsaina kosa ny Tavako satria ny fiarahanao mandeha Amiko dia ny firosoanao hiova amin'ny *fanavaozana ny saina*. Raha mampitodika ny fisainanao Amiko ianao dia aoka ho fantatrao fa mifantoka aminao koa Aho. Aminao mandrakariva ny fijeriko satria tsy voafetra ny haififantohako. *Mahalala anao Aho ary azoko tsara ny tianao hambara. Fitiavana mandrakizay no itiavako anao. Fa Izaho mahalala ny hevitra iheverako anao, dia hevitra hahatonga fiadanana, fa tsy loza, mba hanome anao fanantenana ny amin'ny farany*. Atolory tanteraka ny tenanao ho amin'ity ainga vao izay hahafahanao mianatra hahatsapa ny fanatrehako ity.

Romana 12.12 ; Jeremia 29.11

2 janoary

Iaino ny fanatrehako mitondra fanasitranana. Eny na dia amin'ny fotoana iarahanao Amiko aza, ny fisainanao dia mbola mirona amin'ny fandaharam-piainanao sy ny zava-manasatra anao isan'andro. Ankino Amiko ny sainao hahafahako mampitony sy manavao azy. Avelao ny fahazavan'ny fanatrehako hiditra lalina kokoa ao aminao, ary ianao kosa dia hifantoka Amiko. Amin'izany no anolorako anao izay rehetra ilainao hoentinao matrika ny adinao isan'andro. Izany fotoana voatokana izany dia sady fanomezam-boninahitra Ahy no fanamafisana anao. Mahafoiza fotoana hiarahanao Amiko. Tohero ny antson'ny asa aman-draharaha. Ianao no *efa nifidy ny anjara tsara, tsy halaina aminao izany*.

Salamo 105. 4 ; Lioka 10. 39-42

3 janoary

Meteza ianao hitony ao anatin'ny fiadanana'ny fanatrehako. Afaka ho ao amina amin'ny fotoana rehetra sy eo amin'ny toe-javatra rehetra izany. Mianara miafina ao anatin'ny fanatrehako, eny fa na dia eo amin'ny fotoana hiatrehanao ny adidy eto an-tany aza. Sady amina Aho no eo amina. Hanokatra lalana eo anoloanao Aho no sady eo anilanao ihany koa. Tsy misy sakaiza feno fanoloran-tena toa Ahy.

Satria Izaho dia namanao mahatoky, amin'ny dingana ataonao no ahitan'ny hafa fa maila-pamindra ianao. Aza manaiky ho resin'ny olana sy ny fanontaniana mampangitakitaka, satria Izaho no efa mitondra ny vesatrao. Eo amin'izao tontolo izao no iatrehanao sedra sy zava-miseho mety hahaketraka anao, kanefa aza manaiky ho voafatotr'izany ianao. *Izaho efa naharesy izao tontolo izao*, ary Izaho efa nanaisotra taminy ny fahafahana hamotika anao. Ao Amiko no hanananao fiadanana feno.

Salamo 31. 20-21 ; Jaona 16. 33

4 janoary

Tiako ianao hanana fahazarana vaovao. Andramo ny miteny hoe Jesoa, matoky Anao aho, na inona na inona toe-javatra mitranga eo aminao. Rehefa manana fotoana ianao, dia banjino ny maha-Izaho Ahy, ny fahamboniako sy ny voninahitro, ifantohy ny halaliny sy ny halehibeazan'ny fitiavako anao.

Io fahazarana io no hanampy anao hahita Ahy ao anatin'ny toe-javatra rehetra sy hahatakaranao ny fanaraha-maso ataoko amin'ny maha Mpanjakan'izao tontolo izao Ahy. Raha raisinao amin'izany fomba fijery izany avokoa ny zava-mitranga rehetra, amin'ny fahazavan'ny fanatrehako manerana ny tontolo rehetra, dia tsy hanan-kery aminao intsony ny tahotra. Ny fifanoherana dia ho tonga sehatra iray ibeazanao raha tena manamafy ny fahatokisanao Ahy ianao na inona na inona zavatra mitranga. Dia handray ny fitahiako amin'ny fahaterahana vaovao ianao, ary hahatsapa fa fahasoavana mivantana avy Amiko izany. Ny fitohizany'ny fahatokiana tsy tapaka Ahy dia hanamafy ny fifandraisanao Amiko sy hihazona anao ho eo akaikin'ny foko.

S

alamo 63. 2-4, 139. 7-10 ; Isaia 40.10-11

5 janoary

Afaka miaina fiainam-pandresena ianao amin'ny fihazonanao ny fifandraisana miankina tanteraka Amiko. Amin'ny ankapobeny ny olona dia mampifandray ny fahambonian'ny fandresena amin'ny tsy fanaovana fahadisoana sy ny fahamendrehana. Ny marina anefa, ireo izay mandresy amin'ny herin'ny tenany dia manaraka ny lalany manokana ka manadino Ahy. Ao anatin'ny olana sy ny fahalavoana, ny fahalemana sy ny tsy fahampiana no ianaranao miantehitra Amiko. Ny fianteharana Amiko dia tsy midika ho fangatahana Ahy hitahy izay fanirianao, fa ny fanatonanao Ahy amin'ny fo sy ny saina misokatra, ka manasa Ahy hanatanteraka ny faniriako ho anao. Amin'izany dia afaka mampiditra nofy izay heverinao ho toy ny tena sarotra tanterahina ao am-ponao Aho. Ho tsapanao fa tsy ho vitanao ny hahatratra tanjona toy izany irery ka hanomboka hiantehitra tanteraka Amiko ianao. Fandehanana amin'ny finoana izany, dingana tsikelikely hahatonga anao hiankina Amiko. Nefa ny tsy fahombiazana tsirairay dia arahin'ny fiverenan'ny fitomboana, tsara tohan'ny fitosaky ny fiankinana Amiko hatrany. Mankamamia ny fitahian'ny fisian'ny fahombiazana amin'ny fianteharana hatrany hatrany Amiko.

Salamo 34.18-19 ; 2Korintiana 5.7

6 janoary

Izaho mahay manao mihoatra lavitra noho izay angatahinao na izay heverinao aza. Manatona Ahy amin'ny fo feno faharetana, fantaro fa tsy misy fetra ny mety ho tanterako. Angataho ny Fanahiko hanjaka ao amin'ny fanahinao hahatsapanao ny tena fahalehibiazako. Aza kivy na misy amin'ny vavakao aza no mbola tsy nivaly. Mpampianatra mahay dia mahay ny fotoana, hampianatra anao hahay hiandry Ahy sy hatoky Ahy ao anatin'ny haizina izy. Ny fahasarotan'ny zava-mitranga no hitarika anao hahatakatra ny voninahitro sy ny fahamboniako. Aza avela hanosika anao ho amin'ny fisalasalana ny zava-tsarotra miseho fa vao mainka ataovy an-tsaina fa ho fanomanana anao ho amin'ny fidirako an-tsehatra be voninahitra izany. Sokafy tsara sy afantohy tsara amin'izay rehetra ataoko eo amin'ny fiainanao ny maso sy ny sainao.

Efesiana 3. 20-21 ; Romana 8. 6 ; Isaia 40. 30-31 ; Apokalypsy 5.13

7 janoary

Tsy ho vita mihitsy ny hisaotra sy hidera Ahy amin'ny fotoana rehetra. Fa voasoratra hoe : *mipetraka eo ambonin'ny fideran'ny oloko Aho*. Matetika ny fivavahanao dia miseho amin'ny fanehoam-pifaliana tampoka manoloana ny zava-misy na ny fitahiana lehibe. Fa amin'ny fotoana hafa dia manaradalàna kokoa sy voafetra, maneho asa an-tsitrapo izany. Manana fijery mitovy anefa Aho amin'ireo karazana fiderana roa ireo. Ny fahaizana mankasitraka dia lalam-piandrianana hidirana amin'ny fifandraisana akaiky Amiko. Ny fo mahay mankasitraka dia manan-toerana lehibe tokoa Amiko.

Rehefa misaotra Ahy ianao ny amin'ny zavatra mahafinaritra rehetra nomeko anao, dia manamafy izany fa Izaho no Andriamanitra, ary avy Amiko no iavian'ny fitahiana rehetra. Raha mitranga ny olana, kanefa mbola mankasitraka Ahy hatrany ianao, ny fitokiana ny fiandrianako dia singa miavaka tokoa ao anatin'ny tontolo tsy hita maso. Fenoy fiderana sy fankasitrahana ny fotoananao malalaka rehetra. Izany fahazarana tsara izany dia hanampy anao mba hiaina fifandraisana akaiky Amiko.

S

alamo 22. 4 ; 146.1-2 ; 1Tesaloniana 5.18

8 janoary

Amin'ny fahalemem-panahy no anehoako ny fanatrehako. Mandondona eo am-baravaran'ny fahatsiarovan-tenanao ny fahazavana mamirapiratra, mikatsaka ny hiditra ao. Ny fananako ny fahefana rehetra any an-danitra sy etý an-tany dia tsy manakana Ahy tsy ho feno halemem-panahy aminao. Ny fahalemenao anie ho tonga varavarana misokatra iray ho amin'ny fanatrehako. Isaka ny mahatsapa ho tsy mahavita zavatra iray ianao, dia tsarovy fa *eo foana Aho izay Mpamonjy anao*.

Manantenà Ahy, dia ho voaro amin'ny fahaketrahana sy ny fangoraham-po ho an'ny tenanao ianao. Ny fanantenana dia toy ny tady mampifandray anao amin'ny lanitra. Arakaraka ny fisintonao eo ambony no vao mainka itondrako ny vesatry ny entanao. Hihamaivana ianao noho izany. Ny fahasahiranana dia tsy hita ao amin'ny fanjakako. Ifikiro ny fanantenana, ary ny taratry ny famirapiratako no hanazava ny haizinao.

Salamo 46. 2 ; Romana 12.12 ; 15.13

9 janoary

Miaraka aminao Aho ary ho anao. Rehefa manapa-kevitra ny hanao zavatra araka ny sitrapoko ianao, dia tsy hisy na inona na inona any an-danitra na etý an-tany hahasakana anao. Mety ho tojo olana maro ianao mandritra ny dingana hatratraranao ny tanjonao, kanefa aza mora kivy, ary aza mijanona mihitsy. Amin'ny alalan'ny fanampiano, dia hihoatra ambonin'ny dingana rehetra aza ianao. Aza manantena fa ho mora ny lalana hiarahantsika mandeha isan'andro, kanefa tadidio, Izaho izay *Mpanavotra anao* eo mandrakariva dia mahefa ny zavatra rehetra.

Ny faniriana ny zavatra ho tanteraka alohan'ny fotoany no loharanon'ny adin-tsaina maro. Ny fiandrianako dia misongadina amin'ny haifitantanana ny fotoana izay itrangan'ny toe-javatra. Raha tianao ny hitoetra eo Amiko, ary hanao ny zavatra rehetra araka ny fitondrako, angataho Amiko ny haneho anao ny lalana hizorana isaka ny mamindra. Raha tokony ho maika hanatratra ny tanjonao ianao, dia aleo Izaho no hanapaka ny hafainganana arahina. Mandehana mora ary mifalia amin'ny fanatrehako.

Romana 8. 3 ; Salamo 46.2-4 ; Lioka 1. 37

10 janoary

Isaka ny manamafy ny fitokisanao Amiko ianao, dia manampy vola iray ao amin'ny fitehirizako. Toy izany no fanangonanao harena amin'ny fotoan-tsarotra. Raketiko ato am-poko ny fahatokiana napetrakao tamiko, ary tsy mitsaha-mitombo ny vokatr'izany. Arakaraka ny fandanianao betsaka noho ny Amiko no hanomezako anao fahafahana hanao izany.

Apetraho Amiko ny fahatokiana amin'ny andro tony, raha iny tsy misy na inona na inona mitranga iny. Ka rehefa tonga ny tafio-drivotra, ny tahirim-bolanao dia ho ampy hiatrehanao izany fotoana izany. Manangona harena any an-danitra amin'ny alalan'ny fametrahanao ny fitokianao Amiko. Io fahazarana io no hihazona anao ao amin'ny fiadanako.

Salamo 56. 4-5 ; Matio 6. 20-21

11 janoary

Matokia Ahy, ary aoka iandraiketako ny fanaraha-maso rehetra. *Mijanòna ianao, ary fantaro fa Izaho no Andriamanitra.* Izaho no Tompon'ny tany : Izaho no namorona azy ary Izaho no mifehy azy. Ny andraikitrao dia ny mamaly ny dini-pitiavako. Ny andrasako amin'ny zanako dia ny fahaizana mandray. Tandremo tsara io fanomezana novoleko tao am-ponao io. Velomy amin'ny fahazavan'ny Tavako izy.

Rehefa maneho Ahy ny fangatahanao ianao, dia avelao eo antongotro ny fanahiana. Miresaha Amiko amin'ny fahitsiana, aboraho Amiko ny ao am-ponao. Aorian'izay dia anehoy fankasitrahana Aho ny amin'ny fanatanterahana izay efa omaniko alohan'ny hahitanao azy. Rehefa miverina ao antsainao ny fangatahanao, dia tohizo ny fisaoranao amin'ny valiny izay efa an-dalana. Rehefa asehonao Amiko ny lisitry ny fanahiana, hiaina amin'ny fifanandrinana tsy mitsahatra ianao. Raha misaotra Ahy amin'ny fomba famaliko ianao, ho tsara kokoa ny toe-tsainao. Ahafahanao mifantoka amin'ny maha eo Ahy sy amin'ny fampanantenana nataoko ny vavaka fankasitrahanao.

Sala

mo 46.11 ; Kolosiana 4. 2 ; 2Petera 1. 3-4

12 janoary

Avelao Aho hanomana anao amin'ny andro Izay miandry anao. Haiko tsara izay hoavoakany na dia tsy mifamahofaho eo anoloanao aza izany. Te hanana karatra aza ianao hamoaka ny antsipirian'ny andronao sy ny fotoana tokony handraisana fanapahan-kevitra. Mahatsiaro mahazo antoka kokoa ianao rehefa iny manana fahalalana kely momba izay hiseho anio. Kanefa misy fomba izay hahafahanao miomana amin'izany mialoha dia ny fiarahanao amin'ny fotoana mahafinaritra Amiko.

Tsy haneho anao ny antsipirian'ny tontolo andronao rehetra izany fa azo antoka kosa fa hanome anao fitaovana hiainana izany tsaratsara kokoa. Ny fanatrehako mivantana no hiaraka aminao amin'ny dingana tsirairay amin'ny lalanao. Mijan'ona amin'ny fifandraisana mitohy Amiko, bitsiho moramora ny anarako isaka ny mila mihodina amin'ny eritreritrao ianao. Amin'izay dia afaka hampifantoka ny fijerinao Amiko ianao amin'ny fotoana rehetra. Ny fisiako eo amin'ny fiainanao no karatra tsara indrindra.

Eksodosy 33. 14 ; Jaona 15. 4. 7

13 janoary

Ezaho ny fiainanao isan'andro ho toy ny dia voamana mialoha voafaritry ny Mpitarika anao. Meteza ho voakasiky ny teniko sy izay efa nomaniko ho anao fa aza mikaroka ny hilentika ao amin'ny fanaovana ny fandaharana rehetra araka ny fanirianao. Mahaiza mankasitraka Ahy noho ity andro vaovao ity, ary maneke fa fanomezana manokana sarobidy izany. Manana fahatokisana ny fisiako eo anilanao, na tsapanao izany na tsia. Ny fahazarana mankasitraka sy fahatokiana dia hanampy anao hahatakatra ny toe-draharaha araka ny fijeriko.

Ny fiainana eo anilako dia sady tsy mankaleo no tsy fantatra mialoha. Miomàna ianao amin'ny zavatra tsy ampoizina isan'andro. Reseo ny fahazarana mitady ny lalana mora foana. Meteza hanaraka Ahy amin'izay lalana rehetra hitondrako anao. Na dia mafy sy miolakolaka aza ny lalana eo alohanao, ny toerana azo antoka indrindra dia ny eo anilako ihany.

Salamo 118. 24 ; 1Petera 2. 21

14 janoary

Avelao Aho homba anao, hanome anao ny fahasoavako sy ny fiadanako. Sokafy ny fo amam-panahinao handray zay efa homaniko ho anao. Aza menatra ny tsy fisiana hitanao eo aminao. Ny mifanohatra amin'izany aza, raiso ary izany mba ho fepetra entina hameno anao amin'ny fiadanako.

Mora ny maneho endrika ivelany, ary manao toy ny mahafehy ny zavatra rehetra. Ny ezaka ataonao mba hanehoanao fa tsara ianao mety hamitaka ny ankamaroan'ny olona, fa Izaho kosa, mahita tsara anao, hitako hatrany amin'ny lalina indrindra amin'ny tenanao. Ny endrika ivelany manodoka dia tsy manana toerana eo amin'ny fiarahantsika. Mifalia amin'ny tena fahalalako tsara anao. Resaho Amiko ny adinao, sy ny fahatsapanao ho tsy mahavita zavatra. Mandeha tsikelikely ny fanovako ny tsy fahombiazanao ho lasa herinao. Tadidio fa ny fifandraisanao Amiko dia vontom-pahasoavana. Izany indrindra no antony *tsy misy amin'izay ataonao na tsy ataonao mahasaraka anao amin'ny fitiavako.*

1Samoela 16. 7 ; Romana 8. 38-39

15 janoary

Mamiratra eny aminao ny endriko, mitaratra fiadanana mihoatra noho izay eritreretinao aza. Mety ho eo anivon'ny ranomasin'ny olana no misy anao izao, kanefa mifanatri-tava Amiko ianao. Izaho no fiadananao. Rehefa mijanona Amiko ny eritreritrao dia azo antoka ny fiarovana anao. Fa raha afantokao amin'ny olanao kosa izany, ny hiafaranao dia hihotsaka miaraka amin'ny vesatry ny olanao. Raha tonga anefa izany, dia miantsoa tsotra hoe : Jesoa ô ! Ampio Aho, dia hanarina anao Aho.

Avy eo dia hiaina eo anilako ianao, ary ho azo antoka ny fiarovana anao. Ny zava-mitranga no mampivilavila anao, ary ny onjan-drano no mandrahona anao, *afantohy Amiko ny fijerinao* : Tsy miova mandrakizay Aho. Ny fotoana hahatongavana hatreny aminao, ny fitopan'ny onja dia efa nampifandanjako amin'ny fandaharako. Eo anilanao foana Aho, ary manampy anao hiatrika ny onjan'ny androany. Ny hoavy dia matotoa mikasa hampitahotra anao. Aza miady saina ny aminy ianao, ary mijanona eto anilako.

Filipiana 4. 7 ; Matio 14. 30 ; Hebreo 12. 2

16 janoary

Manatòna Ahy, ary mialà sasatra ato Amiko feno fitiavana. Fantatrao fa ity andro ity dia haneho zava-tsarotra ho anao, ary efa mitady vaha olana amin'izany sahady ianao. Amin'ny fiheveranao mialoha ny ora eo anoloanao, dia hadinonao fa Izaho mihitsy no miaraka amina, anio ary mandrakizay.

Ny fitamberenan'ny olana dia antony iray fampidirana azy hiverina ao amin'ny fiainanao, kanefa ianao dia tsy tokony hamoaka izany, sy hiady amin'izany raha tsy efa mitranga eo tokoa izy. Aza mampitombo ny fahorianao toy izany ianao. Ny mifanohitra amin'izany aza, manatòna Ahy, ary avia miala sasatra amin'ny fiadanako. Hanome hery anao sy hanomana anao hiatrika ity tontolo andro ity Aho, ary hanova ny tahotrao ho lasa fahatokiana tanteraka.

Matio 11. 28-30; Josoa 1. 5-9

17 janoary

Mankanesa aty Amiko amin'ny fo feno fankasitrahana ahazoanao misitraka ny fanatrehako. Andro natokako ity. Tiako mba hifaly ianao anio ary handà ny hihevitra sahady ny ampitso. Katsaho izay efa nomaniko mialoha ho anao. Miandrasa handray ny fitahiana tsy manam-paharoa ary raiso tsara ny zava-manahirana rehefa mitranga. Raha tena mifantoka Amiko ianao, dia ho hitanao fa afaka manao fahagagana Aho amin'ny andro faran'izay mahazatra.

Manatona Ahy amin'izay ilainao rehetra, amin' ny fahafantaranao fa ny harenako be voninahitra dia tena ampy hameno ny banga ao aminao. Mijanona amin'ny fifandraisana tanteraka Amiko, ahafahanao miaina eo ambonin'ny zava-mitranga na dia heverinao ho manafotra anao aza izany. *Aza manahy na inona na inona; fa aoka ny fivavahana sy ny fifonana mbamin'ny fisaorana no hoentinareo manambara ny fangatahanareo amin'Andriamanitra amin'ny zavatra rehetra. Ary ny fiadanako izay mihoatra noho ny fahalalana rehetra, hiaro ny fonao sy ny hevitrao ao Amiko.*

Salamo 118. 24 ; Filipiana 4.19, 6-7

18 janoary

Mitondra anao amin'ny lalana tsara Aho, ary fantaro fa misy ny fiakarana sy fidinana. Eo amin'ny faravodilanitra dia misy zavona be tsy hifankahitana, hazavain'ny fahazavan'ny masoandro. Ny faniriana hahatratra io marika io dia tsara tokoa saingy tsy tokony hiezaka ny hitady lala-manitsy ianao. Ny anjaranao dia ny manaraka Ahy, ary ny mamela Ahy hitarika anao. Meteza ho voasariky ny fijerena ambony kokoa kanefa mijanona ho eo anilako.

Mianara mahatoky Ahy rehefa tsy mety daholo izay atao. Ny zava-miseHo tsy ampoizina manimba ny tontolo andronao no maneho fa tena ilaina ny miankina Amiko. Ny fanekena ampahatokisana ny sedra no mitondra fitahiana ambonin'ny zava-drehetra. Meteza ho tantanako amin'ny fotoana rehetra ny tontolo andronao, satria efa nomaniko mialoha ny antsipiriany rehetra. Tsy hihena izany fahatokisana izany na dia mikitoantoana sy feno sakana aza ny lalana. Ataovy toy ny sakafonao ny fahatokisana Ahy, ary hazony mafy ny tanako. Rehefa miaraka isika dia handresy.

Jaona 21. 19 ; 2Korontiana 4. 17 ; Habakoka 3.19

19 janoary

Tadiavo ny Tavako dia hahita mihoatra noho izay nofisinao ianao. Avelao Aho handray ny toeran'ny fisalasalana ao amponao. Toy ny zavona feno rano Aho, vonona ny hanondraka ny eritreritrao amin'ny fiadanako. Efa toetrako mihitsy ny mandrotsaka fitahiana. Ny anjara andraikitrao dia ny mandray izay atolotro anao amin'ny fankahasitrahana. Talohan'ny fiforonan'izao tontolo izao dia efa nisy ny tena fifamenoana. Omeo voninahitra Aho amin'ny fandraisana ny soa avy Amiko am-pankasitrahana.

Raha ny marina dia Izaho no tadiavinao. Rehefa mitady Ahy ianao dia mahita Ahy, ary afa-po noho izany. Rehefa mirona mankany amin'ny tanjona tsy dia manahoana ny eritreritrao, dia mijanona ao ambadika Aho amin'ny fiainanao. Eo foana Aho, mijery ary mahita, fa ianao kosa dia mihevitra anao ho toy ny irery. Ny fahazavako dia manazava ny zava-mitranga rehetra izay misy anao. Manàna fiainana mamiratra amin'ny fampidirana Ahy ao anatin'ny sehatry ny fomba fijerinao rehetra. Aza avela hisy na inona na inona, na olona na zavatra hampijanona anao amin'ny fikarohana ambony indrindra izay ataonao : Izaho.

Sa

Iamo 27. 8 ; Filipiana 4. 7 ; Jeremia 29. 13

20 janoary

Midira amin'ity andro ity amin'ny fahatsiarovanao ny hoe iza no filoha. Amin'ny fandaminana rehetra dia tsarovy fa Izaho no mpandrindra ny zavatra rehetra amin'ny fotoana. Amin'ny andro mampandeha ny zavatra rehetra araka ny efa nomanina mialoha dia manomboka hadinonao ny fisiako manan-kaja. Amin'ny fotoana tsy mampirindra araka ny tokony ho izy ny lamina nataonao, tadiavo izay misy Ahy, satria efa manatanteraka zavatra lehibe ao amin'ny fiainanao Aho, zavatra izay hafa mihitsy tsy araka ny fandaminanao.

Zava-dehibe tokoa ao anatin'izany fotoana izany, ny fihazonanao ny fifandraisana Amiko. Ary hanaiky ianao sady hahatsapa fa ny laminasako dia lehibe indrindra noho izay efa nataonao. Aza manandrana hahatakatra akory izay miseho. Matokia fotsiny ihany, ary misaora Ahy mialoha amin'ny zavatra tsara izay efa hirotsaka ao anatin'izany fisamboaravoarana izany. *Izaho mahalala izay hevitra hiheverako anao, dia hevitra hahatonga fiadanana.*

Isaia 55. 9-11 ; Jeremia 29. 11

21 janoary

Tiako ho Ahy manontolo ianao, ary ho potehiko izay fahalemenao. Ao Amiko irery ihany no misy ny fiarovana anao, fa tsy misy any amin'ny olona hafa, na ao anatin'izay zava mitranga. Ny fiankinana Amiko manokana dia toa mampatahotra kokoa noho ny mahita olona milalao amin'ny fandehanana amin'ny tady, kanefa ny fiarovana azo antoka dia efa eo ambany eo dia ny sandriko tsy manam-petra izany. Noho izany dia aza matahotra ny hianjera, fa afantohy Amiko ny fijerinao. Eo alohanao mandrakariva Aho, ary manara-maso ny famindranao, sy ny dingana ataonao. *Na ny any ambony, na ny any ambany, na inona na inona amin'izao zavatra ary rehetra izao dia tsy hahasarakana anao amin'ny maha eo Ahy be fitiavana.*

Deuteronomia 33. 27 ; Romana 8. 39

22 janoary

Apetraho Amiko ny fahatokisanao Ahy amin'ny sehatra mitombo vahana hatrany. Izay rehetra mitarika anao ho amin'ny fisalasalana dia dingana iray hampitombo anao. Aza mitsoaka ny ady fa atreho miaraka amin'ny faniriana fatratra hahita ny fitahiako izay efa nafeniko tao izany. Raha tena tsapanao tokoa fa Izaho no mpanapaka ao amin'ny fiainanao rehetra dia afaka matoky Ahy ianao amin'ny zavatra rehetra izay mitranga. Aza mandany hery amin'ny fitomaniana amin'izay mitranga, ny maha izy azy sy izay tokony ho izy aminy. Meteza hanaiky ny zava-misy araka izay miseho eo, ary tadiavo ny lalako eo afovoan'ny zavatra rehetra.

Ny fahatokiana dia toy ny langilangy iray azonao ianteherana raha mandroso miaraka Amiko eo amin'ny lalanao ianao. Raha matoky Ahy marina tokoa ianao, izany langilangy izany no hitondra ny vesatra rehetra ilaina. Miankina Amiko ianao, ary zarao Amiko izay ao am-ponao sy izay ao an-tsainao rehetra.

Salamo 52. 12 ; Ohabolana 3. 5-6